

TXOSTEN EKONOMIKOA. EAEko ekonomiak hobera egingo du aurten, baina harrokeriarik gabe. Iazko geldialdia Euskal Herrian beste herrialdeetan baino sakonagoa izan zen, eta aurten %2,1eko hazkunde iragarri dute Euskal Ganbarek.

Ganberen aurreikuspen ekonomikoak «ez dira guztiz baikorrak» 2003rako

Guztira 7.000-10.000 lanpostu eratuko direla eta langabezia tasa %7-%7,5era jaitsiko dela iragarri dute

Joseba Aiertza | BILBO

Euskal Ganbarek ez dute «oso aurreikuspen baikorrik» egin aurtengo bilakaeraz ekonomikoaz, hobekuntza apala espero duten arren. Hala adierazi zuten Josu Lapatza, Jose Maria Etxarri eta Ignacio Etxebarria Araba, Gipuzkoa eta Bilboko ganberetako presidentek, hurrenez hurren iazko txosten ekonomiko eta aurtengo aurreikuspenak aurkezteko egin-dako agerraldian.

EAEko hazkunde ekonomiko %1,8koa izan zen iaz, eta aurten %2,1ekoa izango da. Hazkunde tasa hori Europako Batasunerako aurreikusitako batez besteko %1,6koa baino handiagoa da, baina Espainian esperotako %2,5ekoaren azpitik dago.

Prebisio apal horren arrazoia, euskal ekonomiaren izaera «zabala» da, nazioarteko bilakaeraren menpe dagoelako eta, beraz, mundu mailako ziurgabetasunek baldintzatu egiten dutelako. Horregatik, nazioarteko ekonomiaren susperraldiaren atzerapena, batez ere Europako ekonomiarena, euskal ekonomiaren bilakaeraren kaltean dator.

Aurtengo aurreikuspen ekonomikoak euskal enpresarien artean egindako inkestetan oinarrituta aurreratu dute ganbarek. Enpresaburuek orokorrean «hobekuntza apala» espero dute, eta euren konfiantza indizea ez da iaz bezain negatiboa, nahiz eta oraindik negatiboa izan. Euren aburuz, Industri sektorea «zertxobait sendotu» egingo da, zerbitzuek «indarra galdu» egingo dute eta eraikuntzak «bere jarduera moteldu» egingo du.

Esportazioen suspertzea


Esportazioak, ordea, aurten hobetu egingo direla uste dute euskal enpresariak. Izan ere, iazko ekitaldian zehar jaitsi arren, azken hilabeteetan suspertze zantzuak eman izan ditu kanpo merkatuak. Barne merkatuaren dinamismoa mugatu-



MARISOL RAMIREZ / ARGAZKI PRESS

Jose Maria Etxarri (Gipuzkoa), Ignacio Etxebarria (Bilbo), eta Josu Lapatza (Araba) ganberetako buruak, atzo, Bilbon.

2003rako aurreikuspenak EAE



ITURRIA: Eusko Ganbarek

ta mantenduko da, ordea. Azkenik, inbertsioak gutxitu egingo dira aurten, baita enpleguaren sorrera ere.

Enpleguari dagokionez, Euskal Ganbarek iragarri dute guztira 7.000-10.000 lanpostu berri sor litekeela EAE, iaz baino

gutxiago (26.000 lanpostu eratu ziren 2002an). Enplegu horri esker, langabezia iazko abenduko %9ko tasatik %7ra edo %7,5era jaitsiko da 2003ko ekitaldiaren bukaeran.

Iazko ekitaldiari buruz, ganbarek gogoratu dute esperota-

EKONOMIA IREKIA

Euskal ekonomia kanpora zabalik dagoenez, nazioarteko egoeraren menpe dago

INFLAZIOA

Prezioen kontrolik eza mehatxu larria izan daiteke euskal enpresen lehiakortasunerako

ko susperketa ekonomiko ez zela heldu azkenean, eta nazioarteko ekonomia nagusiek, batik bat AEBetako eta EBko ekonomiek, ez zutela sendotasun itxura argirik eman.

Testuinguru horretan, «euskal ekonomiaren geldialdia inguruko herrialdeetako baino sakonagoa» izan zela diote erakundeek. EAE %1,8 hazi zen,

EBren %0,8ko tasaren gainetik eta Espainiaren paretik. Industria, eraikuntza eta zerbitzu alorrekin apaldu egin zuten euren hazkunde 2001tik 2002ra.

Kontsumoaren apaltasuna

Ganberen txostenak erakutsi duenez, euskal kontsumitzaileen konfiantzak nabarmen egin zuen behera iaz. Auto matrikulazioen %11ko jaitsiera horren erakusgarria izan da.

Azkenik, Euskal Ganberen txostenean inflazioa ageri da berriz ere iazko bilakaeraren adierazle nabarmen eta kaltegarrien artean. Prezioak «kontrolik gabe» igotzen ari direla ohartarazi dute. «Europako Batasuneko inflazio tasarekiko aldea gero eta zabalagoa denez, euskal ekonomiarentzako kaltea gero eta handiagoa da, enpresek lehiakortasuna galdu egiten dutelako. Prezioen moderazioa ez da heltzen, eta industri prezioen bilakaerak ere ez du batere gauza onik iragaritzen», diote.